

0.0.1 arakkhitasuttaṃ

1. atha kho anāthapiṇḍiko gahapati yena bhagavā tenupasaṅkami. upasaṅkamitvā bhagavantaṃ abhivādetvā ekamantaṃ nisīdi. ekamantaṃ nisinnaṃ kho anāthapiṇḍikaṃ gahapatiṃ bhagavā etadavoca:
2. citte gahapati arakkhite kāyakammampi arakkhitaṃ hoti. vacī kammampi arakkhitaṃ hoti. manokammampi arakkhitaṃ hoti.
3. tassa arakkhitakāyakammantassa arakkhitavacīkammantassa arakkhitamanokammantassa kāyakammampi avassutaṃ hoti. vacīkammampi avassutaṃ hoti. manokammampi avassutaṃ hoti. tassa avassutakāyakammantassa avassutavacīkammantassa avassutamanokammantassa kāyakammampi pūtiyaṃ hoti. vacīkammampi pūtiyaṃ hoti. manokammampi pūtiyaṃ hoti. tassa pūtikāyakammantassa pūtivacīkammantassa pūtimanokammantassa na bhaddakaṃ maraṇaṃ hoti. na bhaddikā kālakiriyaṃ.
4. seyyathā'pi gahapati kūṭāgāre ducchanne kūṭampi arakkhitaṃ hoti. gopānasiyo'pi arakkhitā honti. bhitti'pi arakkhitā hoti. kūṭampi avassutaṃ hoti. gopānasiyo'pi avassutā honti. bhitti'pi avassutā hoti. kūṭampi pūtikaṃ hoti. gopānasiyo'pi pūtikā honti. bhitti'pi pūtikā hoti.

5. evameva kho gahapati citte arakkhite kāyakammampi arakkhitam hoti. vacīkammampi arakkhitam hoti. manokammampi arakkhitam hoti. tassa arakkhitakāyakammantassa arakkhitavacīkammantassa arakkhita manokammantassa kāyakammampi avassutam hoti. vacīkammampi avassutam hoti. manokammampi avassutam hoti. tassa avassutakāyakammantassa avassutavacīkammantassa avassutamanokammantassa kāyakammampi pūtiyam hoti. vacīkammampi pūtiyam hoti. manokammampi pūtiyam hoti. tassa pūtikāyakamman-tassa pūtivacīkammantassa pūtimanokammantassa na bhaddakam maraṇam hoti. na bhaddikā kālakiriya.

6. citte gahapati rakkhite kāyakammampi rakkhitam hoti. vacīkammampi rakkhitam hoti. manokammampi rakkhitam hoti. tassa rakkhitakāyakammantassa rakkhitavacīkammantassa rakkhitamanokammantassa kāyakammampi anavassutam hoti. vacīkammampi anavassutam hoti. manokammampi anavassutam hoti. tassa anavassutakāyakammantassa anavassutavacīkamman-tassa anavassuta manokammantassa kāyakammampi apūtiyam hoti. vacīkammampi apūtiyam hoti. manokammampi apūtiyam hoti. tassa apūtikāyakamman-tassa apūtivacīkammantassa apūti manokammantassa bhaddakam maraṇam hoti. bhaddikā kālakiriya.

7. seyyathā'pi gahapati kūṭāgāre succhanne kūṭampi rakkhitam hoti. gopānasiyo'pi rakkhitā honti. bhitti'pi rakkhitā hoti. kūṭampi anavassutam hoti. gopānasiyo'pi anavassutā honti bhitti'pi anavassutā hoti. kū-

ṭampi apūtikam hoti. gopānasiyo'pi apūtikā honti. bhitti'pi apūtikā hoti.

8. evameva kho gahapati citte rakkhite kāyakammampi rakkhitaṃ hoti vacīkammampi rakkhitaṃ hoti. manokammampi rakkhitaṃ hoti. tassa rakkhita kāyakammantassa rakkhita vacīkammantassa rakkhita manokammantassa kāyakammampi anavassutaṃ hoti. vacīkammampi anavassutaṃ hoti. manokammampi anavassutaṃ hoti. tassa anavassuta kāyakammantassa anavassuta vacīkammantassa anavassuta manokammantassa kāyakammampi apūtiyaṃ hoti. vacīkammampi apūtiyaṃ hoti. manokammampi apūtiyaṃ hoti. tassa apūtikāyakammantassa apūti vacīkammantassa apūti manokammantassa bhaddakaṃ maraṇaṃ hoti. bhaddikā kālakiriyāti.